



# Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :

f Tir Yimiyim

Instagram tiryimiyim@aolima

YouTube tir yimiyim

TAPAK 7

Tammang madak tesangwa  
agi takok angutsü: Zelenskyy

Amit Shah-i Delhi nung lokti tsungda  
rara menokdangtet: Sharad Pawar



VOL. XIX NO. 191 (ADOK 191) DIMAPUR TENTONÜ (MONDAY) RONGCHII (APRIL) 25, 2022

₹ 5.00

## COVID-19 Nagaland: Shiranger ka danga mali

**Kohima, April 24, 2022**

**(TYO):** Nagaland nung Deobarnü COVID-19 puteta alir ka taneptsü anguba ajanga shiranger shinga mali kumogo.

Külen, tanü agi anogo pungu atongtepa nisung shinga dak-a COVID-19 meputet. Nisung 35,488 rongnungi 33,244 taneptsü nguogo aser ibaji

taneptsü angur 93.68% lir.

Nagaland nung COVID-19 puteta alir nisung 760 asü saka parnok nisung 4 dakbo tanga timtem liasü.

Nagaland nung COVID-19 alitsü akok ta temolung melemi bilemba sample 4,71,479 tendangogo aser Covid vaccine indang dose 16,16,875 agütsüogo.

## Japan nung Covid anema mozüjang yanglur

**Tokyo, April 24, 2022**

**(Agencies):** Japan nung Shionogi & Co Ltd ajanga COVID-19 adokdaksüba virus anema experimental treatment ka takok ngua inyakdar.

Iba süngjang dang S-217622 ta ajar aser SARS-CoV-2 virus agienba sayuogo ta Deobarnü Shionogi company-i metetdaksü. Shionogi ajanga yangluba

antiviral pill ya linük aikati aginür aser tang Japan nung mozü tendangertemi asadangdar.

Taküm March ita Shionogi-i United States teyari agia alima nung Phase III trial tenzüksü ta metetdaksa liasü.

"Onoki küm nung mozü dose million 10 shi yanglutetsü" ta Chief Executive Isao Teshirogi-i ashi.

## Manipur media outlets-i sorkar aser state BJP dak sendakba osang madoktsü

**Imphal, April 24, 2022**

**(Agencies):** Manipur sorkari Honibar nikonngang 4:00 ako tashi nung advertisement bills magütsü aliba agütsütsü mepishiba tashi mangaba ajanga Manipur nung media outlets-i Manipur sorkar aser Manipur BJP dak sendakba osang madoktsü telemtetba agiogo.

Iba telemtetba ya newspaper publishers, editors aser Manipur Hill Journalists Union (MHJU) aser All Manipur Working Journalists' Union (AMWJU) teshimtet nübotem ajanga agiogo.

Manipur nung BJP sorkar nungi telangzüba kecha manguba sülen iba telemtetba agi ta parnoki ashi.

Manipur sorkar aser ruling parties- BJP o NPF dak sendakba osang kecha madoktsü. Sorkar advertisements ajak mokdangtsü ajisüaka Manipur Pradesh Congress Committee president-i nangzüka ajanga parnok nem

mapang apuloktsür ta parnokisa metetdaksü.

Media mokdangba mapang Governor indang office, Speaker indang office, COVID-19, aser wara dak sendakba osangtem madener ta parnokisa ashi.

Manipur chief minister aser chief secretary ajanga nangzüka sorkari advertisement bills magütsür. Taoba mapang chief minister aser chief secretary nati nija osang agütsüba ajanga parnoki mokdangtsü aliba thinena liasü.

12 buba Manipur Assembly election mapang BJP aser opposition Congress ajanga sen crore aika indang advertisement adokba bill magütsü lir.

Covid wara aser news production jenjang tasakba akümba ajanga Manipur nung media houses-i senotsü tsütsü timtemer. Parnoki state sorkar dang tensa apir sen menoktsü mepishia aru saka telangzüba kecha mali.

## Karnataka nung hijab sülen Laishiba atema ashishiteper

**Bengaluru, April 24, 2022**

**(Agencies):** Karnataka yimtiba Bengaluru nung aliba Clarence High School-i tsüraburtem dang parnok chirnurtemi school-i Temeshi Laishiba bener aruba menokdangtsü ta tenangzüka agidaksüogo.

Ajisüaka, right-wing teloktemibo iba tetuyuba ya Karnataka Education Act alema lir ta tai tongloktsür.

"School-i non-Christian kaketshirtem dang tashiyim agi Laishiba züngdaksür" ta Hindu Janajagruiti Samithi State Spokesperson, Mohan Gowda-i ashi.

Ajisüaka, Clarence High School-i parnoki lemetetbaji tim dang aser Bible-based education agütsür ta o meyiptsüogo.

Grade 11 indang admission application form nung "Nür tanuri pa/la moral & spiritual welfare atema Morning Assembly Scripture Class aser Clubs dena

class ajak nung adentsü molunger aser pa/la Clarence High School nung azüngdang Bible aser Hymn Book abenba menokdangtsür" ta tsüraburtem nem nangzükdaksür.

Tawa tu Karnataka state sorkari school tem nung Bhagavad Gita sayutsü atema sentong aliba osang metetdaksüogo.

School curriculum nung Bhagavad Gita enoksemba ya asüngdangya asüba sülen lemetetsü ta chief minister-i ashi.

Gujarat state sorkaria March 17, 2022 nü class 6 nungi 12 tashi school syllabus nung Shrimad Bhagavad Gita enoksemtüsü telemtetba agiogo.

"Nüma atangtsü aser sobaliba den sendakteptsü atema iba ya inyaktüsü" ta sorkar sangdong ka nung metetdaksü.

Hindu Janajagruiti Samithi-i Karnataka education department dang school-i Laishiba benokba atema temerenshi agütsütsü ayongzüko.

## PM Modi-i states & UTs den COVID senden amentsü

**New Delhi, April 24, 2022**

**(Agencies):** India nung COVID-19 tensa tasen ka ajuruba atema Prime Minister Narendra Modi-i Bodbarnü chief minister ajak den senden ka amentsü.

Iba senden nung states aser union territories (UTs) nungi Chief minister tem aser Prime Minister's Office (PMO) ketdangsürtem adentsü. Senden nungsa Union health minister Mansukh Mandaviya, Union home minister Amit Shah aser tanga ministry tem nungi ketdangsürtem adentsü ta osang

ajanga ashi.

Senden nung Union health secretary Rajesh Bhushan-i tang wara indang tensa, vaccine agütsüba aser state kar nung virus menatepa indang osang lemsateptsü.

Taoba nunga Prime Minister-i chief ministers aser district magistrates den Covid-19 meyipa reprangshiba sendentem menogo.

Taoba hopta ana tsungda India nung nisung aika dak COVID-19 putetogo aser iba ajanga wara pezübuba adoker ama tsübuteper.

Deobarnü India nung nisung

2,593 dak COVID-19 putet aser tanü agi anogo ana atongtepa nisung 2,500 tema dak COVID-19 putetogo.

Tang tashi nung nisung 4,30,57,545 dak putetogo, nisung 5,22,193 asü, 4,25,19,479 taneptsü nguogo aser 15,873 anepaludar.

Uttar Pradesh, Delhi aser Tamil Nadu densema state aika nung public tesemtem nung mask enokba ozüng agienogo saka kanga putetba ajanga mask enoktsü ozüng agütsüshiogo.

## China nung Covid-19 wara pezübuba adokogo

**New Delhi, April 24, 2022**

**(Agencies):** China yimtiba Beijing nung COVID-19 kanga puteter aser Shanghai nunga tanü COVID-19 ajanga nisung 39 asüba osang metetdaksüogo.

Deobarnü China nung nisung 21,796 dak COVID-19 putet aser parnok teimba ka Shanghai nung putet, ta China indang National Health Commission-i metetdaksü.

Honibarnü Beijing nung nisung 22 dak putetba sülen COVID-19 nungi kümdanga

alitsü osang sangoktsüogo.

Hokolbarnü Beijing nung aliba middle school ka nung kaketshir 10 dak COVID-19 puteta liasü aser iba sülen ketdangsürtemi hopta ka atema school shibangtsüogo.

"Hopta ka tejakdang nungi nisungtem tsungda virus menatepba meputeti dang süidaksü aser iba ya schools, tour groups aser kibongtem sasep nung liasü" ta Beijing Centre for Disease Prevention and Control deputy director

Pang Xinghuo-i ashi.

Külen, Shanghai nung Omicron variant kanga menateper. Honibarnü Shanghai nung nisung 23,370 dak COVID-19 aliba putet aser parnok züngsema taküm March 1 nungi nisung 466,000 dak putetogo.

China nung tang nisung 29,531 tashi anepaludar aser December 2019 nung Wuhan nung mezüng putetba sülen coronavirus ajanga nisung 4,725 süogo.

## NFHRCC-i anir teloktemi Foothills Road tembangdak Khelma semdang



April 22-23, 2022 anogotem Nagaland Foothill Road Coordination Committee (NFHRCC) den külemi CNTC, ENPUD, CNSA, DENSU aser Young Nagas Action Committee on Foothills Road nungi teshimtet nübotemi Peren district kübok Khelma semdangdang agiba noksa ka angur.

**Dimapur, April 24, 2022**

**(TYO):** Nagaland Foothill Road Coordination Committee (NFHRCC) den külemi CNTC, ENPUD, CNSA, DENSU aser Young Nagas Action Committee on Foothills Road nungi teshimtet nübotemi April 22-23, 2022 anogotem Peren district kübok Khelma semdangdang.

Mon district kübok Tizit nungi tenzüker kilometre 395 talang Foothills Road Connectivity lenmang ya Khelma nung tembanger.

Iba sentong ya Nagaland Zeliang People's Organisation (NZPO) ajanga host asü aser Jalukie Town, Athibung, Ikesingram Village aser Khelma Township nung lennirtem den sendentem amen.

Senden balala amendang

NFHRCC-i anir telok balalai Chief Minister Nephui Rio aser Dy. CM Y. Patton na lenisüba kübok state sorkari Foothills road ya mega Project kümdaksüba aser MORTH, Govt. of India dangi Trans Nagaland Expressway tenüng jalokja abenba atema pelaba metetdaksü.

Parnokisa state sorkar dang India sorkar den tekaratiba nung iba mapa inyaktüsü atema jembiteptsü nenshia metetdaksü.

NFHRCC-i anir telok balalasa PMGSY Schemes Contractor firms ajak dang mapang lateta aliba tsungda Foothills Roads den sendaktepa aliba mapa tembanga inyaktüsü mepishia metetdaksü.

Parnokisa yimtsüng aser kin ketdangspurtem dang state sorkar aser mapa inyaktertem den DPR nung lateta aliba ama amalitepa

yariteptsü aser nübotem ajangzüksü atema tangar nem meinprong mesüdaksütsü atema tayongzüka agütsü.

Foothills road connectivity mapatong metembang tashi State sorkari Rs.20 Crores lezmükja aliba sen tanga mapa nung mamshitsü atema mepishir ta NFHRCC-i anir teloktemi metetdaksü.

Parnokisa tekaratiba nung Khelma Administrative circle dangi Administrative aser Police personals mapa lezmüktsütsü atema state sorkar dang mepishia metetdaksü.

NZPO aser Khelma o Ikesingram yimtsüngtem meketa alirtemi kanga pelashishia agizükba atema pelaba metetdaksür ta NFHRCC ketdangpurtemi ashi.



# Dzukou Valley nung mürekmeju mapa inyak



**Dimapur, Rongchii/April 24 (TYO):** Spear Corps indang Red Shield Division kübok Four by Four Brigade ajanga Southern Angami Youth Organisation (SAYO) nungi volunteers tem den külemi April 24, 2022 nü tebour tajung Dzukou Valley nung 'Joint Cleanliness Drive' ka ayongzüka liasü.

Iba mürekmeju sentong tembangba sülen Brigadier Amit Sharma, Station Commander, Zakhama Military Station aser Metekhrielie Mejura, President SAYO den yariteptsü asoshi bendanga

agütsür inyaka aruba ama Indian Army ajanga iba mapa nung osettsüset, nübu aser süngojemtsü agi yaria lanurtem den külemi iba tesemi aoba lenmang Viswema nungi müreka oa liasü.

Iba mürekmeju sentong tembangba sülen Brigadier Amit Sharma, Station Commander, Zakhama Military Station aser Metekhrielie Mejura, President SAYO den züngsemtemi

volunteers tem den tepela lemsatapa liasü.

Indian Army ajanga adianu ama temeimtep tanüla adokdaksüba aser kati ka akumtsüba maparen balala nung shilem tajung agiba atema yangji aliba nüburtemi pelaba shia liasü.

Iba sentong nung Indian Army nungi lenir 9 den sepai 23 aser SAYO nungi volunteer 17-i jana bendenba bag 52 sünga jana bendena liasü.

# Dimapur Government College nung Earth Day mungogo



**Dimapur, Rongchii/April 24 (TYO):** Dimapur Government College nung April 22, 2022 nü "Upcycle Creation: Transforming Waste to Wealth" omen nung ajemdaker Earth Day anogomung munga liasü.

Iba anogomung tenzüka anepdang 8:00 ako nung college Principal, Innovation Council, Eco and Beautification Club

Dr. Temjensangla Pongen, Associate Professor, department of Geography, Fazl Ali College, Mokokchung ajanga "Exposition on Waste and Waste Management" onük nung jembia liasü.

Sentong tanabuba nung jana agi tagitsü oset yangluba indang sayua liasü. Iba mapang A4 paper (approximately 75 gsm paper) agi paper cup yangluba aser plantain leaves agi bowls yangluba sayua liasü.

Shisalen sayuri T-shirt aser jeans tejen amshia yangko yanglutsü yimyatam sayua liasü.

Iba sentong nung Anungla Aier, Associate Professor & Convenor, Eco & Beautification Club, DGC ajanga melepzüng o jembia sentong tembanga liasü.

# Kohima DLSA ajanga Chiephobozou nung Mini Legal camp ayongzük



**Dimapur, Rongchii/April 24 (TYO):** Kohima District Legal Services Authority ajanga Additional Deputy Commissioner office, Labour Dept. Kohima, CDPO office Chiephobozou, Childline, Elderline Nagaland, Bank of Baroda, Ophthalmologist Sarita Thapa aser Elina Swu nunger den lungjemer April 23, 2022 nü Chiephobozou nung Mini Legal Camp ka ayongzüka liasü.

Iba sentong nung EAC Chiephobozou, Vikato Yepthomi NCS ajanga tarur pela agizükba o jembi aser Y Longkumer, Principal District and Sessions Judge aser chairman Kohima DLSA ajanga anogomung ratet indang jembia liasü.

Iba sentong nung Nokshei Kano, Chief Judicial Magistrate & Secretary KDLSA dena liasü.

Iba sentong nung adener nem parnok oshi nung züluba

legal awareness pamphlets tem lema agütsü.

Kasa sentong nung angati Aadhar enrolment, legal counselling, tenüng melenshiba, birth/death certificate application tem agüja liasü.

Maneni telok balalai nüburtem nem scheme balala nungi teyari agüja liasü. Iba sentong nung department balala nungi nisung 180 shi nem teyari agüja liasü.

# African swine fever mechi Tripura nung maneni ak tepseter

**Agartala, Rongchii/April 24 (Agencies):** Tripura state kübok Debipur breeding farm nung African swine fever putetba sülen iba ak metsüba tesem nung shiranga aliba ak tem tepseter aser anema alirtem tesem balala nung bendener.

Animal Resource Development Department nungi ketdangsürtem aser sepaitem lia ak tepsetba maparen ya inyaka liasü.

Ajisüaka ARDD ketdangsürtemi ak tepsetba yimya ngur nüburtem süngmanga liasü.

Iba tashidak keta aliba ak aremstsü atema miim aketba mozü khaloktsütsü lemtet saka ak ya zükset/akoset ta ashir.

Iba tashidak aliba ak ajunga mezüng anogo metepsetma, anungji Deobarnüa maneni tepseta liasü.

"Tang tashinung ak 121

tepsetogo," ta ketdangsür kati ashi.

Iba tesem nungya sorkar indang ak metsüba tesem 38 lir aser yangji iba tashidak ya poktet, ta jembir.

Police ketdangsür aser ARDD lenirtemi farm ajak semdang aser tepsettsü asoshi ak agütsütsü shia liasü.

Iba maparen inyaksü atema ak ajak Debipur farm bushia bener arutsü. Central sorkar indang scheme nung aliba ama nija farm lapoka metsür nem teyari agütsütsü.

Ajisüaka shishilempar telok kati tashidak keta aliba ak ya sen talang agi alizüka ayoker, ta osang ajanga ashir.

Nija meyong lapoka aliba farm kiburtem jenjang ajemtsü tetsübu nung ak ayok tenzükogo. Iba osang angashia civil administration ajanga farm kibur nem awareness agütsür.

# Assam OIL nung cyber attack ya Nigeria nungi inyak

**Guwahati, Rongchii/April 24 (Agencies):** Assam kübok Duliajan nung Oil India Limited indang system nung cyber attack ya Nigeria nungi inyak, ta bushisüngdager temi ngutet.

Iba mapa tamajung inyaker yagi Nigeria nungi OIL indang server nung ransomware (sen magütsü tashi computer system mamshitetba software tabu ka) inoktsü, ta bushitet.

OIL indang Geological and Reservoir department indang workstation ka nung April 10 nü iba ya ataloka liasü.

Iba osang ya OIL IT department ajanga April 12 nü metetdaksü.

Cyber attacker yagi kongshia aliba PC (computer) nung sen \$ 75,00,000 (crore 57 dang timba) meshia liasü.

*(Maneni tapak 3 nung...)*

# Eco Club FAC ajanga Earth Day 2022 mungogo



**Dimapur, Rongchii/April 24 (TYO):** Eco Club, Fazl Ali College, Mokokchung indang Executive Council-i anir club züngsem 27-i April 22, 2022 nü anogomung munga sentong balala ayongzüka agia liasü.

Iba mapang club züngsemtemi Chuchuyimpang yim sema Peace Walk ka agia liasü aser iba mapang nüburtem nem awareness agütsütsü mechi teka agi yangluba poster tem tesem balala nung malokja liasü.

Taküm iba anogomung omen "Invest in your planet" omen nung ajemdaker züngsemtemi

college telungzük nung club indang Organic Garden nung züngtong kar tema liasü.

Kasa mapang parnoki asenok aliba alima asoshi inyaksü mapa tajung 52 züluten aser college nung hashtag #WhatWillYouDo for your planet amshia proka liasü.

Iba sülen college nung tesayur, kaketshir aser taoba mapang zünga alirtemi pei-peid kidang aser college nung mapa balala inyaka liasü.

Iba anogomung nung club züngsemtem tsüngta tesendaktep tali tajungba kuma yanglushi aser chiyongtsü lemsatapa chia-jema liasü.



# Mizoram aser Bangladesh tsüngda shishilembaba mapa küma inyaksü tongtipang: Tipu Munshi



**Aizawl, April 24, 2022**

**(Agencies):** Bangladesh commerce minister Tipu Munshi-i ashiba agi, Mizoram aser Bangladesh tsüngda border trade mapa küma inyaksü aser achaayangtsü asoshi Bangladesh sorkari temolung agüja inyakdar.

Munshi-i Hokolbarnü Aizawl tonga aru aser Honibarnü pai Mizoram commerce & industry minister Dr R. Lalthangliana den külemi south Mizoram Lunglei district kübok Tlabung subdivision Kawrpuichhuah nung Integrated Check Post (ICP) lapoktsüba tesem aser Mizoram Mamit district nung Silsury yimtsüng nungi kilometre 20 shi pila orr Sajek arem nung border haat semdanga liasü.

Lennir ana den Mizoram aser Bangladesh sorkar nungi tongtibang ketdangsürtem dena liasü.

Kawrpuichhuah nung ICP atema shimba tesem nung sentong ka agiba mapang Munshi-i "Mizoram den artsü adena shishilembatsü asoshi maparen tenzüksü aser

sentong takok ngua inyaksü asoshi Bangladesh sorkari bendanga agütsür inyaksü mulunga lir" ta ashi.

Lunglei district nung ICP amenoka mapa küma aotsü aser Mamit district kübok Silsury, Tuipuibari, Nunsuri aser Marpara nung border haat achaayangtsü atema Ato Kilonser Sheikh Hasina-i anir Bangladesh Sorkari nungdakba mera ajak agia inyaksü renema lir, ta pai ashi. Iba maparen tangatetep nung inyaksü asoshi Bangladesh minister-i Mizoram sorkar ajungshia liasü.

Mizoram aser Bangladesh tsüngda shishilembaba ajanga rongsenketzüng tsütsü ajangzükba dak alia kidanger linük aser northeast state tsüngda tesendaktep tali akangshitsü inlar, ta Munshi-i lemsatetep.

Sajek nung border haat atema shimba tesem semdangba mapang Munshi-i, iba border trade ya Bangladesh aser Mizoram atema rongsenketzüng atema tajangzük asütsü, ta ashi.

Mizoram nungi boulder lung aser lisopurtemi züsentetba chiyongtsü talisa sümomo, mersü den süngolemba tem belentsü asoshi Bangladesh-i mulunga dang lir kechiyong kidanger linük nung nüburtemi item product kanga akanger, ta pai ashi.

Lalthangliana-isa ashiba agi, border trade maparen takaratiba nung tenzüksü asoshi Mizoram aser Bangladesh artsü nung item kisü-jensü maparen takok angutsü asoshi meranga inyaksü.

Bangladesh den iba border trade lapokba ajanga Mizoram rongsenketzüng tsütsü nungittsü kechiyong State nungi süngolemba densema local product balala den kisü-jensü dang amshiba boulder lung aser stone chips yoktettsü, ta pai ashi.

Munshi aser Lalthangliana nati Sajek nung border haat atema nungshilung aziungtsüogo. Tenati, Bangladesh artsülen Udaipur nung border haat atema shimba tesem ka semdanga liasü.



Sikkim Police tenteter küm 125 ajungba tenüng nung Sikkim yimtiba Gangtok nung motorbike rally ka agidang tangokba noksa angur. Sikkim Police ya November 27, 2021 nü tentet aser iba nungtem nung küm piyong atema sentong balala ayonga agir. Kilometre 50 tashi bike rally ji Upper Tadong MLA G.T Dhungel-i Rangpo nungi tenzüksü aser Pangthang nung aliba Sikkim Armed Police camp nung tembang.

# GMC election nung BJP & AGP-i takok tulu angu

**Guwahati, April 24, 2022**

**(Agencies):** Assam nung Bharatiya Janata Party (BJP) aser parnok den yariteper Asom Gana Parishad (AGP) ajanga Guwahati Municipal Corporation (GMC) nung takok tulu nguogo.

Guwahati kübok wards 60 nungi BJP aser AGP ajanga wards 58 nung takok angu. BJP-i ward 52 aser AGP-i wards 6 nung takok angu.

Assam nung second-largest party aser Opposition Congress-i menden ka nung danga takok mengutet. AAP aser AJP teloktemi menden kaka nung takok angu.

Hokolbarnü wards 60 nungi 57 atema GMC elections agi aser iba nungi BJP-i menden 49 aser AGP-i 6 nung takok angu.

Election magidang yongi wards 3 nungbo BJP den tetokteper shinga melii takok nung liasü.

BJP, AGP nem takok tulu agütsüba atema Guwahati nung alirtem dang pelar ta Prime Minister Narendra Modi-i metetdaktüsügo.

"Iba takok ajanga nübortemi

onoki akhümtsubua aliba Prime Minister lenisüba kübok onoki terenlok inyakba nung tamang akaba sayur" ta Assam chief minister Himanta Biswa Sarma-ia metetdaktüsü.

GMC election nung AJP-i mezüng takok angu:

Guwahati Municipal Corporation (GMC) election atema vote azüngba maparen tembangogo aser iba election nung Assam Jatiya Parishad's (AJP) teloki tan mezüng seat ka angur asütsü.

Candidate Hukum Chand Ali Bakshi-i GMC nung ward no 1 seat nguogo ta AJP-i metetdaktüsü.

Deobar anepdang 9:30 ako tashi vote azüngba mapang Aam Aadmi Party (AAP) densema tanga party ka danga seat timba anguba maliasü.

GMC election nung AAP-i seat aika angutsü imlaa liasü, saka tanga party ajatetsüsa parnoki vote aika mangu.

Municipal Ward 57 atema vote counting agia liasü aser nikongdang 2:00 ako meta iba maparen tembanga liasü.

# Arunachal Deputy CM Chowna-i Governor Mishra den ajurutep



Chowna Mein & Brig (Retd) Dr. BD Mishra

**Itanagar, April 24, 2022**

**(Agencies):** Honibarnü Raj Bhawan nung Arunachal Pradesh Deputy Chief Minister Chowna Mein-i State Governor Brig (Retd) Dr. BD Mishra jaoka aser State dak sendakba onük balala nung tena sensaksema liasü.

Iba senden agiba mapang State nung ozüng alema opium lu ayimba, East Siang district kübok Pasighat nung State University tenzüksü aser State Sorkar department balala nung meinyaki aliba pension maparen indang nung tena olemtepa liasü.

# Assam OIL nung cyber attack...

(TAPAK 2 NUNGI...)

Iba sülen sorkari temaba jenjang nung bushisüngdangtsü sangdonga liasü aser tang tashi ka dak tenük yoker mapa ya inyak asü tapi agi inyakar ano mejangjateter.

Assam police indang criminal investigation department (CID) ajanga Oil India Limited cyberattack ken

Angh Mishra-i, opium lu ayimba anentsütsüla aser iba melen parnok nem (opium lu ayimer) horticulture inyakym densema tanga tsünüsembongtsü yoktsüsa administration ajanga lenmang tanga lapoktsütsü asoshi mera tapet agitsüla, ta ashi.

Deputy CM, Chowna-ia Angh Mishra dang Anüdoklen State semdangba osang tongmelang agi metetdaktüsü. Iba den külemi opium lu ayimba aser temesepba mozü amshiba tebilemstü; aser State nung Namsai district terenlok maparen metetdakja liasü.

o ya bushisüngdanga liasü. Assam police indang CID indang cybercrime cell nungi ketdangsür telok ka Dibrugarh district kübok Duliajan nung Oil India Limited indang headquarters nung arua lir.

Intelligence Bureau (IB) nungia ketdangsür anati iba tesem ya semdanga liasü.





## TIR YIMYIM YIMOBILEM (EDITORIAL)

DIMAPUR TENTONÜ, RONGCHII (APRIL) 25, 2022

### Govt mapa nung inyakba takoksa

**T**alisa asen lima nungbo nisung ajaki government mapa bushir, anungji government mapa rakteper, aji oda government mapa bushidang Tsüngrem tsüngdang taia menar aser nisung dena meputep tenzüker. Ibaji kodang bilemdangdir, government mapa nung inyaksüba ya kanga tajung aser tajangzük aketba mapa ka südi ta angatetter. Aji oda, shiranga mapai maoyonga ita senbo angutsü aser ano tular kümra, gari den talidak ki aser kidang mapa nung yaritsü atema teyarir dena agütsütsü. Ano tajung kaji, mapa nungi anener külena ita shia pension sen angutsü aser pension magütsüyonga mapa nungi anendang, mapa inyak piyong government-i bendena yutsüba sen aika agizüktsü. Item tajangzüktemji aginüba agi tazünger mazünger ajaki government mapa rakteper südi. Ajisüaka, kodang nisung taküm arishi den government mapa inyakba tajangzük ya medemdangdir, kangasa takoksa ta medemdangtetsü, kechiyong ita sen chia alitsü atema taküm nung temang tashi itta aliba mapang tajung tepiyong tangar kidang kilia aliba den kasa lir. Ibayongji, government mapa inyakertem dang government tenzüker ta danga masü saka government nung alirtem meyang kilir, government servants, ta ajar. Iba jagi taküm tepiyong asen dak sempet aser tashi liaka, asen inyaknüsü meinyak, 'yes sir' aser 'yes madam' ta tangar tenyalen, tangari ashiba angaa inyaksüsa akümer. Aji oda, government mapa nung ochishia inyakertem asoshibo tantsür tambur kümer pension anguba sülenang, pei ki yanglutetsü aser küm ishika yangji lir külen taküm atemtsü. Atangji, government mapa nung aliyonga, teyakyak nisungtemibo pei ita senbo süngojemtsü asoshi ayur ama yur, tanga len nungi bendenba rongsen agi takar kuma kiojen tajung yanglur alir. Ajisüaka, item rongnung ochishia rongsen bendenertembo kanga ishika dang asütsü saka tanüngbajibo pei department nung tangar asoshi aruba sen miimzuka agiba sen agi takar akümba purtem asütsü. Aji oda, takarbo takar saka pei takar akümba agi nisung tsüngdang nümamedangtetter aser Tsüngrem dena sadoksadoka sarasadema mesütetter ta temulungjang nung tarendak agi sünga aliba pur, government mapa nung inyakertem, aika lir. Item rongsentemji, Laishibai ashir, senmang kuma moi ozü ama tashikang dener yimshia aotsü. Ibaji alima nung nisung ka asoshi koda takoksa aser tesusatsü tulu ta bilemer. Ano, government mapa nung inyakertem yabo, temang nung tashi itta alidang, jangratema pei sempet aser tashi amshia nübortem asoshi teyari agütsütetba mapa ka inyaksüba sentong nung alir masü, saka tesülen mapa nungi anener anisüngzuka alitsü asoshi dang bilema 'retirement scheme' nung dang aliba purtem lir. Ibaji kodang jungjunga bilemdangdir, tezudangtsüka, kechiyong taküm piyong asenok ya 'retire' ser lia aotsüba atema inyaksüba masü saka 'retire' masüdang, tetezü temang nung tashi itta alidang, asena asen akok tashi alima nung aseni inyaktetba ajanga tangar nem teyari agütsür ka süa lir, Tsüngremi arishi moatsüra, tantsür tambur akümtsübjang alima nem tajangzük agütsüteta aliba takümtem asütsü. Joko, iba ama taküm tetezü angatetba agi, lanurtem aikati government mapai aitsü nükjidong mayur saka kechi züngdir züngaka jungjunga zünger peii angazükba aser peii metetba tashi amshia, tamasayongi peisasa mapa tenzüka meinyaktetaka, tangar mapa nung küm ishika inyaka sen aarer külen peisasa pei mapa ka apiteta tenzüker. Aji oda, tanübo talisa technical azünger küm 25 majung lanur aika company balala nung ita sen lakh ana asem chia mapa inyak tenzüker aser küm 35 nungbo iba nung jagi anener, peisasa pei jangraba mapa ka tenzüka inyaker. Item jagi dang Tsüngremi pei nem agütsüba sempet, tashi aser mapang ajak shitak amshia alima nung nisungtem asoshi tajung inyaka toktsür aoer. Kodang item denji tanü asenok ita sen kisung chia alitsü tangatetba nung government mapa bushir aser government mapa nung inyakertem taküm aser mapang endokba medemdangdir, government mapa nung inyakba takoksaji asenoki jungjunga angatetsü. Iba jenjangji mangatetba agi, asenoki taia menaa government mapa bushir, tayoka ayoker aser talia alir aser government mapa nungi tantsür tambur kumaka manener. Ajisüaka, government mapa nungi manennüba tetezü ana dang lir, kaji tangar kilir süa dang linür asütsü akok aser tanabubaji, ita sen dang nungi tajangzük tuluba agitsü lenmang pipoka yur iba lenmangji toktsür memeyipner asütsü akok. Itemji kodang asenoki angatetdir, asenoki government mapa angurtem masü saka peisasa mapa tenzüka inyakertem nungang asangtsü aser nükshtsü, kechiyong ajibo kilir mapa masü aser len meshidaklen nungi rongsen bushiba lenmanga masü, saka alima nung Tsüngremi nükjidong tongteta aliba takümtem asütsü.

## OLEMSABANG

### LANURTEM ASOSHI AROGO TEINYAKTSÜ

- Talimoa Longkümer

*"Asen lanurtem asoshi tarutsüji asenoki tetibo meyanglutetsü saka tarutsü asoshi asen lanurtem asenoki yanglutetsü."*

- Franklin D. Roosevelt

YSS sensaksem ayongeri 1 Tim 4:12 "Ne lanua (asangwa) shinga nema mezüngmeshi tesüdaksü, saka o aser jakla-liro nung, temeim nung, tamang nung, temerükba nung tamangertem madang na tatishitsü ka liang", iba Lai tekong nung ajemdaker Youth ministry nung Ao Arogoi kechi tashi ka inyaka arudar? Kechiba youth-temi tamangba nung mejangrar? Dignity of labour tanela koda youth rongnung ajungmesotsü? Tanü arogoi youth ministry nung kechisa inyak nung ajungtsü? iba sendakba nung sensaksem kaa liasü. Yangi tongmelang agi item onüktem tatsüba nung ocet kuma yanglur lemsateper.

#### Youth Ministry tangatetba

Atangji tarutsü alima teimlaji tanü lanurtem lir. Anungji lokti ajaki kanga dang temulung agüja mapang, rongsen, shisatsü ajak agi lanurtem asoshi meranga inyaksüji kanga tenüngdaksü. Arogo ka noksaji par arogo nungi adokba lanurtem jagi sayur. Arogo nung lanurtemi shilem magira iba arogoji kanga junga shisadanga bilemdangtsü nungdak. Tanü asung shisatokden sabang balala nung alima khuretttem bendena jembidang aikati tanü lanu putu yanglushia asung tarutsü asoshi parnok dak tamang teimla yua jembir. Saka aiben Arogo nung youth ministry nung temulung magütsüba angutsü.

Pastor Tiatoshi Longkümer shiba Youth ministry nung mapang talangka tenzüka aru, pai tanü Ao Arogo nung youth ministry tebilemstü yamai ashir, "Youth ministry-ji arogo tenzüka mapa nung tanubudi ta angatetba sayur (Youngest section in church ministry). Arogo yimjak nungsa mayimakasa amangbapurtem ajaki youth director/pastor ya arogo tenzükerem rongnung tanubuti/tsüla ta bilemba tanü tashi lir. Hau, youth ministry-ji theological college nung graduate süli anguba mapa ka ama lir. Ano tazüngba tajung liakasa küm nung tera tanubor süra youth director yakta dang shimba inyakyim-a arogo nung asenoki angur. Tanü tashi asenok ajaki angateta aser amshia aruba yimya kaji youth ministry/departmentji tanga tenzüka mapa asoshi renemshiba mapa ka ama mesüka amshir (a preparatory step to enter into real church ministry). Ni bilemer, tanü arogotem nung kwika pastor mapa teinyakdak lir parnok aika/teimba ka youth director nungi "promotion" (arogo oshi nung mapetba ojang ka) atubatem alitsü südi."

Kasa tebilemstü nung Matsüng Longkümer-i yamai lemsatep: "Asen arogo nung youth directorji küm ishika asoshi shimer dang ta arogopurtemi aser youth director/pastortemia bilema mapaji agizüker." Iba tangatetba ya kenyongi tai. Matsüng Longkumeria ashi, "Danga limabo Youth ministry nung lenir/pastortem ya akümüli piyong youth ministry nung rakloker bendanga agüja inyakba lir. saka asen lima tebilemstü kaji kibong kümerbo Youth ministry inyakbaji mazü/mapet amai jembitsür/angateter. Anungji youth den inyaksü sempet liaka Youth ministry toktsütsüsa akümba tensa lir nung. Iba yongji youth director/pastortem aiben melenba agi leman aika nung tetsükdaksü alur tat. agi (i) lanur asoshi long term ministry meinyakteter (ii) lanurtem Youth pastor den tesendaktep junga meyangluteter (kara ministry toktsür aoba ajanga) (iii) ibai ajanga Youth ministryji Arogo nungeri süoki ia magir asü? Anungji Youth ministry ya junga khen angajemdaksütsüla ta bilemer." Youth ministry ya life-long commitment asütsüla ta asüba nungji Mapula Lemtur-i yamai ashi, "Mungdang nung youth Ministry lenirtem ajak pension ngua dang tenzüker, aser melaki dang jangratema tenzüka atemer. Kasa local arogo nunga tenzüksü tali bendanga agütsüshia Tsüngrem dang shisatsü meshia tenzükra tajungbaang akümtsü. Lanur angatetba nung doctor angutsü masü no! Youth pastor aika sempet lep junga mesala, lanur memetetjem, lanuria junga memetet lia sodi agir. Anungji youth pastor yabo küm 2/3 dang ta mebilemli. Pai/lai tenzüka mapa ka metemjungji sodi agiba yabo arogosa akoksar. Mapang ka nung bendang lima nungi aruba temesung nisung kar joko tambur saka youth pastor ta ashi. Anungji akok tashi, long and short term training balala ABAMI achaayanga inyakim tasen, putu den apet katsütsüla. Nüngdakra youth ministry nung amshitetsüsa arogoia tazüngtsü lemanga lapoktsütsüla. Yamaji süra youth ministry tajungba yangertetsü.

#### Arogoi lanurtem asoshi kechi inyaksüla?

Youth Director/Pastor tajung anir arua toktsüba, musical instrument tabensa alia toktsüba kisung jagi lanurtem majungtsü. Arogo ka nung lanurtem telemsa (category) aika dang lir, item group shia sempet aser tejangraba balala. Youth revival ka ayongzuka agiba kisung agi dangbo lanur ka rangpen tekümtet (holistic salvation) mungutetsü saka lanur ka temang, tanela, shisatsü, tekolok ajunga yanglushitsü teinyaktsü aika lir. Arogo teinyaktsü kar:

- \* Lanur ka asoshi Career Guidance ya kangasa tongtipang. Iba ya tazünger mazünger ajaki nungdakba tongtipang teinyaktsü ka lir. Iba amala sentong lanurtem asoshi ayongzuka akatsü kangasa tenüngdaksü.
- \* Lanurtem shia sempet aser tejangraba balala asü nung arogo focus-ji ka nung dang masütsüla. Music kisung nung temulung agütsüba ajanga music mejangrartem atsünga odaksür. Anungji lanurtem sempet apiteta sentong aser tenüngdakba osettem agi peridaksütsüla.
- \* Akok nungbo arogoi sports ministry nung temulung agüja lanur ka sempet amshitetsü sabang yanglutsü nung kanga ajungtsü. (Tat. agi, Brazil nung arogoi football ministry nendaka inyakba ajanga asayar tajung aika adoker).
- \* Youth Director/Pastor mapang shia rongsen entok mesasai training tapu balala agidaksütsüla. Theology azüngdang angazükba kisung jagi lanur ministry nung peria meyaritetsü.
- \* Youth Director/Youth Pastorji kangadang creative/innovative aser skillful asütsü merangtsüla. Aser Arogoi pa/la yamaji akümtsü maongka aika agütsütsüla. Pastor aser deacontemi pai/lai bener aruba asa-meyang sentongtem ajakbo menokdangtsüla. Yamaji süra ner arogo nungi pai/lai yakta sodi meshir oadoktsü.

*(Maneni asung adok nung...)*

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**



**Baptiba anogo nungi temoatsü tenzüker: Rev Dr Fr Solomon**



April 24, 2022 nü Angami Catholic Union (ACU) office ketdangpur tejenpurtem aser tang shimba tasenpurtem külemi tangokba noksa nung angur.

**Kohima, April 24 (TYO):** Honibarnü 12buba Christ the King Church, Kohima nung 12buba Angami Catholic Union (ACU) mongdang agiogo, aser iba sentong nung ACU advisor, R Rocus Chasie-i 'History of the Catholic Church' onük jembia liasü.

Paisa Catholic Arogo putiotsü nung Arogo kanga mebenteti aruba metetdaksüba den külemi tongti telok ana tsüingda tangatetep kati arutsü imlar, ta ashi.

ACU ecclesiastical & Parish Priest, Rev Dr Fr Solomon Visosieo Vizo-i 'Eucharist the Source & Summit of Christian Life' onük jembia liasü.

Rev. Solomon-i, "Temoatsü ajakji Eucharist ajanga arur, aser ibaji Khristan taküm ka nung Baptiba anogo nungi tenzüker," ta ashi.

"Tsüngremi lidaktsünüba ama asenok taküm ka lidi süra asenoki Yisu Khrista tesayubatem benshitsüla," ta pai ashi.

"Catholics ama asenoki Eucharist tetezü jungjunga metettsüla," ta pai ashi.

Kasa sentong nung Angami Catholic Youth Association aser Chakhro Angami Catholic Union-i ken balala tena liasü.

Nikongdang sentong Northern Angami Catholic Union (NACU) Tir, Viyie Peter leniba nung agi aser aonung sentong Kohima Town Region ACU Tir, Meyacalie Marcus leniba nung agi.

Anogo asemnü trinnial conference Amongnü Bishop of Kohima Diocese Rev. Dr. James Thoppil leniba nung agia iba mongdang tembangogo.

Amongnü nisung meyrjang asem shi iba sentong nung aden. Iba sentong nung jembidang Rev. James Thoppil-i Tsüngrem temeim aser taochi lemsatep.

Pai, ochi tanela nung maneni mission mapa inyaksü aser Tsüngrem mapatem sangdongtsü atema Yisu Khrista nütsüngtem alima dangi yok, ta ashi.

Iba dak sendakba nung pai Khristantem dang ochishia tamang jenjang masetshii alitsüla, kechiyong iba ya Tsüngrem nungi sempet lir, ta ashi.

"Arogo aser tamangertem medenibo Khristai kongshiba aser aneptsübaji mangutsü, anungji tamangertemji Khrista sülen anidaker missionarty kaka asütsüla aser tangar atema taküm kuli kaka asütsüla," ta pai ayongzüker.

Iba sentong ya ACU Tir, Lhousarovi Paul leniba nung agi aser Angami Catholic Women Association (ACWA), Kikrusonuo Clara-i Tenyidie oshi nung meyipzüka liasü.

Angami Catholic Youth Association (ACYA) Tir, Kelhouzasie Lawrence, ACU general secretary Ruokuophreü Rose aser Dean of Science, St. Joseph's College Jakhama, Rev. Fr. Thejahlouie Solo nungeri Lai azüng aser ACWA general secretary Asatuoü Christina-i sarasadema liasü.

Anogo asemnü triennial convention ya Christ the King Church (CKC), Kohima Village nung ayongzüka agi aser ACU-i kümsük tasenba atema office ketdangpur tasenpurtem shim

Tekülem sentong tembangba sülen ACU Tir tasenba, Nosazol Charles leniba nung office ketdangpurtem nem sarasademja liasü.

Tanüingba ketdangpurtemji Neirialie Carlus (Vice President), Kenneth Punyü (general secretary), Rokoshüno Angela Zao (Joint Secretary) aser Kekhriesenuo Christina (treasurer) nungeri lir.

ACU executive council züngsemtemji Southern Angami Catholic Union (SACU), Northern Angami Catholic Union (NACU), Western Angami Catholic Union (WACU), Chakhro Angami Catholic Union (CACU) aser Kohima Town Region Angami Catholic Union (KTRACU) nungi züngsemtem liasü.

**Impur nung lanurtem atema 'Lead Like Jesus' sentong agi**



April 21 -23 ,2022 anogotem nung Impur 'Lead Like Jesus' sentong nung adener lanurtem tangokba noksa nung angur.

**Impur, April 24 (TYO):** Tanü ama tensa ka nung nüngdaka aliba ajemalu lenisüba yimya angazüksü nükla nung ABAM YM ajanga ayonga agia aruba 'Lead Like Jesus' sentong April 21 -23 ,2022 anogotem nung Impur nung kanga takok ngua agiogo, ta ABAM Executive

Secretary, Rev. Dr. Mar Pongener-i sangdong ka ajanga metetdaksü.

'Youth Like Jesus' sentong ya pezübuba telok agiba liasü aser iba sentong nung Arogo trok nungi Associate Pastor Youth-i anir lanurtem 28 arua aden.

Kasa sentong ya ano anünga aliba telok pungo nung agitsü lir, anungji maneni iba sentong anünga alibatem agiyonga aodang Tsüngremi Pa mesükba lenir adokdakja asen lima tesünep nung alitsü tamang ayur, ta kasa sangdong nung shia lir.

**ANOGO ABEN TSÜNGREM DEN**

**Nai Lemsateptsü Asü ? T. Ken 67:1-7**

Iba ken zülur memetet saka alima rangpen mangdang akar kati iba ken zülu. Tsüngremi Pa moatsü, aser Pai iba temoatsüji ajak den lemsatepnü. Pai zülu, " Tsüngremi onok dang aochiang aser onok moajang, aser ne tejak onok dak saklokdakjang"(t.2). Ibai putir kati moatsüba osü mesüker. "Kibubai Pa tejak ne dak yalokjang, aser ne dang yimlibilemang"(Züing 6:24,25).

Tekong 2 nung ken züluri "onok" asemben tashi amshi. Pai Yihuda nunger indang ashi, saka idakji matem. Pai tekong 3 & 4 nung kintem amshi. Tejen Lai nung Yihuda nungeri Tsüngrem moatsüba parnok atema dang ayutsü aikati bilem. Parnok imelemsatepnü. Tsüngrem sentong memesük ! Kechiba Pai Abraham aja ? Alima ajak dangi osangtajungji aotsü atema. Kechiba Yisu asü? Osangtajung osang alima ajak dangi aotsü atema.

Kechiba Kibubai asenok moatsür? Asenoki osangtajungji tangar den lemsateptsü asoshi Tekong 2 nung sarasademba ama sarasademtsü asenok kecha tebilemstü mali: " Tsüngremi onok dang aochiang, aser onok moajang, aser ne tejak onok dak yalokdakjang." Nai tangar moatsütsüsa na temoatsüba süner asü? Tsüngremi asenok tama moatsüba kuliji aji lir. Kar sarasadem langzür asenok asütsü asoshi Tsüngremi asenok sarasadem langzür.

Kin ajak dang Tsüngremer tekümtet metetdaksüba nungi adokba mapaji tenüing asangbaji lir. " kintemi Na sangdakjang, o Tsüngrem; kin ajaki sangdakjang"(t.3). Iba tetezü Israeli dang masü. Bendangertema dena lir. "Kintem peladakjang aser tepela agi ken tendakjang;"(t.4)."kintemi na sangdakjang"(t.5)

"Idangji alui pei terenlok süngjang tangogo. Aseni Tsüngremi asenok moatsütsü" (t.6,7). T.ken züluri ashir, "Kibuba, ni tangar moatsütsüsa ni moajang". Pa tangar asoshi temoatsü aküm, anungji koda tesüngmangtsü.

Na Tsüngremi moatsür rongnung ka asü? Nai lemsatepra, na temoatsü ka asütsü Tsüngremi moatsütsü. Pa indang tangar dang ashiba ajanga Pa taochi metettang.

**Yabo melenshi nung ajungtsü**

Asenoki taoba hopta ka tejaklen "Passion Week" Temoatsü tulu ngua mongtepogo. Iba hopta amongba dak sendakba nungi jembishinü nung temelenshitsü olen/oren kar yamai lemsateper.

1. Asenok aikati Good Friday anogo ya "Yisu Kangkidongi atuba Anogo" ta jembir aser jembiba olen/oren ya shitak ama jembir aser angar. Saka iba olen/oren ya tai lir. Kechiba ta süra, "Kangki" ya süngdong tenüing ka masü, mesüra Süngjangdong tenüing-a masü. Saka "Kangki" ya nüngja ka lir. Anungji "Yisu Kangki nung Metaba Anogo" ta mesüra "Yisu Kangki nung Angenlokba Anogo" ta melenshia shitak olen/oren amshia jembidima. (Jesus didn't went up the Cross nor did he climb up the Cross but Jesus was crucified on the cross).
2. Tekülem Sentep nung Sentong anir karibo tanga hopta Amongnü-tem (Deobar nü) nunga tekülem anitsü tenzükdang "Tanü Yisu Khrista tasü madak takok anguba anogo" ta mesüra "Tanü Yisu Khrista shia aruba Anogo nung" ta shia oki-alaba ya tai. Kechiba ta süra, Yisu Khrista-ji Amongnü (Deobar) shiabo shia maru. Yisu Khrista-ji Good Friday sülen anogo asemnü buba nung, asenoki koba dang "Easter Sunday" ta ajar iba anogo nung dang shia aru. Anungji, Yisu Khrista-ji Amongnü shia (Deobarnü), shia aru ama mejembili. (Jesus Christ didn't rose from the tomb every Sunday but he was risen only on Easter Sunday).

**Mr. T. Wati Longchar. Medziphema Town.**



**OLONG PAITEP # 6150**

	1			2	3			
4			5					6
					7			
	8							
	9		10			11		
					12			13
14								
					15			
		16						

<b>TIPILEN</b>		<b>LANGTSÜNGLEN</b>	
2. Sü jeplok	- (4)	1. _ _ _ _ i	- (4)
4. O agi merenshi	- (5)	3. Kasa masü	- (6)
7. Ayongküm li	- (5)	5. Nüchi masü	- (5)
8. Chiyungtsü mapang süiadok	- (4)	6. Tashi endok	- (5)
9. Tsüngrem den jembiba	- (9)	9. Langtem	- (5)
12. Saklok	- (4)	10. Anü malidang	- (6)
14. Samaba mebushitet	- (5)	11. _ _ _ _ _ kibur	- (5)
15. Mejanga onü	- (5)	13. Tebur tembar tsungda	- (4)
16. Tzü shiruru ka	- (4)	jatepba	- (4)

**OLONG PAITEP # 6149 TELANGZÜBA**

<b>TIPILEN :</b>		<b>LANGTSÜNGLEN :</b>	
1. Ponak, 7. Taribi, 8. Jiro, 9. Khuret,		2. Okila, 3. Amok, 4. Jakrep, 5. Timtem,	
11. Chipu, 15. Kidong, 17. Ajen,		6. Yimten, 10. Tamang, 12. Hadori,	
18. Nangri, 19. Dokan.		13. Akong, 14. Amena, 16. Gado.	

**KOMA SÜLA TELANGZÜBA**

Q. Nagaland government nung inyakertem mapa nung küm 30 tashi dang inyaker anendaktsü nunga koma süla ?

Naga nungerji tsurabur nungi ochiba nung lidar ta kodang südir mapang renema aliba kümzükji shidak, Saka ochibaji meleli ta süra degree course agir amai alinung tajungba. Oh Naga nunger.

- Mr. Kiko.

Sorkar mapa inyakertem ya küm 25 tashi dang inyakdaksütsüla aji asü nung dang unemployment tebilemtsü ya samatsü aser asenoka tanga kin terabo menepa akümtsü ta bilemer.

- WhatsApp

Nagaland nung government service küm 30 ji dang inyakaka itasen mapang shitak nung magütsü tashibo kecha masütsü dang tia reprangdangra government service süaka workcharch pur ama danga government center dang sentsü atsüba küptoka IRP aser NAP ama out of Nagaland nung oa duty inyaker item nem jia mapang shitak nung itasen makütsür nung kota küm 30 ji toktsur küm 20 inyakaka itasen mapang shitak nung magütsüra service ji kopika inyakaka kecha mesütettsü.

- BW Lemtur

**TANÜBO NAI LANGZÜANG**

Q. \_\_\_\_\_ omen nung ajemdaker 'Earth Day 2022' mungogo?

[A] Covid and Planet      [B] Invest on our Planet

[C] Sustainable Living      [D] No to Pollution


===== (Taruba adok nung onoki langzüksü)

**YASHI ADOK TELANGZÜBA :** Sunita Kejriwal

**AO OSHI ANGAZÜKDAK:**  
**TANÜ ANGAZÜKTSÜBA OJANG**

**Metokmeperi**  
(adj) matoksa, meperi (shortcoming)  
Nisung shia dak **metokmeperi** langkabosa lir.

**Metokmesen**  
(adv) keta masen, memeim (dislike, ill treat)  
Kibur aikati kilir **metokmeseni** amshir.



**NAI-A YA METETTER MA**



2015 küm April 25 nü Kathmandu, Nepal anasa menoknok tulu anokba (7.8-magnitude) ajanga nisung 9,000 jungnüa taküm sama aser nisung 22,000 dak tema yirua liasü.

**SUDOKU # 6187**

		4	7	5	9			
5	6		3		8			
1		2		6	8		5	3
			1			8	4	
		3	8		6			
		5	2			3	6	1
			5	7	2	9		
		8		4	1	6	2	7
2	7	9				1	5	

**TELANGZÜBA # 6186**

	1	5	9	7	8	6	2	3	4
4	7	8	9	3	2	6	5	1	
3	6	2	5	1	4	8	7	9	
9	1	3	2	4	5	7	8	6	
2	8	6	3	7	1	9	4	5	
5	4	7	6	9	8	1	2	3	
6	9	4	8	5	7	3	1	2	
8	3	5	1	2	9	4	6	7	
7	2	1	4	6	3	5	9	8	

**OJANG LUTEP # 5734**

- EPI :
- ABAKA :
- NGNU :
- NÜTEK :
- SÜN MAG :
- GATANR :
- DANING :
- ZÜKRAKA :
- TSAGIÜ :
- RANGMEER :

**OJANG LUTEP TELANGZÜBA # 57333**

**ANÜNGDANG MEJANGER MANGMANGA SAKBA  
DANG NUNGBO MAPA TAJUNG INYAKBA TAJUNGTIBA**

**TAN HOPTA ATEMA - KOMA SÜLA ?**

Q. Aor longtrok nungi apok masü Tsüngremi yangluba nisung, Adam aser Eve na nungi jakzükbatem lir ta dang jembi nunga koma süla ?



# Kashmir nung lanurtemibo timtem majurutsü: PM Modi



April 24, 2022 nü Samba district nung Panchayati Raj anogomong sentong nung Ato kilonser, Narendra Modi aser Jammu & Kashmir Lieutenant Governor, Manoj Sinha na adenba noksa nung angur.

## Jammu, Rongchii/April 24

**(Agencies):** Amongnü Ato kilonser, Narendra Modi-i, Jammu & Kashmir nung lanurtemibo parnok tsuraburtem aser tetsü-tebou nungertemi ajangshiba ama timtem majangshitsü, ta metetdaksü.

2019 küm Jammu & Kashmir nung Arlla 370 agienba sülen tang mezüing Jammu & Kashmir semdangba mapang nung Modi-i J&K atema sen crore 20,000 shi indang terenlok projects aika tenzüksüogo aser item rongnung region ana tsüingda mongpu ajak nung senzütetsüsa Banihal-Qazigund road tunnel yanglutsü densema lir.

Kashmir nung lanurtem dang Modi-i, "Iba Valley nung lanurtem, netsü aser nübo, netsü aser nübou nung kanga timtema lia aruogo. Kü lanurtem, nenokibo item ama timtem majangshitsü, ni ibaji nangzüker," ta metetdaksü.

Jammu nung Panchayat Day anogomong sentong nung jembidang Modi-i, Jammu & Kashmir nung lanurtemi ni jembibaji amangtsüla, ta shia J&K nung yimjung aser terenlok alitsü atema tesüiba küm ishika tsüingda par sorkari inyaka arubatem metetdaksü.

"Tanü yangi sen crore 20,000 shi indang projects tenzüksüogo aser itemji connectivity aser electricity den sendaktepa lir. Jammu & Kashmir nung terenlok alitsü atema union territory nung terenlok mapatong aika tenzüker," ta pai ashi.

Item mapatong ajanga union territory nung aliba lanurtem atema mapa maangka jenti agütsütsü, ta Ato kilonseri metetdaksü.

"Samba district kübok Palli nung 500-KW solar power plant tenzüker aser iba ya linük nung mezüingbuba carbon neutral aliba panchayat asütsü," ta pai

ashi.

"Democracy süaka terenlok süaka linük atema Jammu & Kashmir-i tatishitsü tasen sayur. Tesüiba küm ana-asep tsüingda Jammu & Kashmir nung terenlok tsütsü inyakyim tasen aika tenzüker," ta pai metetdaksü.

"Jammu & Kashmir nungi ni linük tesem ajaklen Panchayati Raj Institutions den jembiba ya akhümket ka lir, kechiyong yangi democracy agi ajak tongjemogo," ta pai ashi.

"Jammu & Kashmir putiotsü nung terenlok tsütsü otsü tasen zülutsü. Tesüiba küm ana tsüingda union territory nung nija investment nung sen crore 38,000 nguogo," ta pai ashi.

"Nübur nem tashi agütsüba central ozüngtem Jammu & Kashmir nung benoka meinyaki liasü saka tang aliba sorkaribo item ozüngtem benoka nüburtem nem tashi agütsür," ta pai shisem.

# SC tetuyuba nung Ashish Mishra-i magistrate matsüngdangi ao

**New Delhi, April 24 (Agencies):** Lakhimpur Kheri nung aluyimertem menüingsetba ken o nung Supreme Court tetuyuba nung

ajemdaker Amongnü Union Minister Ajay Mishra'er jabaso, Ashish Mishra-i district jail nung magistrate matsüngdangi ao.

Supreme Court-i Ashish Mishra indang bail thinenja pa dang hopta ka tsüingda jail-i aotsü tuyua liasü.

February 10, 2022 nü Allahabad High Court-i Mishra nem bail agüja liasü saka pa nem bail agütsüba anema ken o benokba angadangba sülen SC-i bail thinentüsü.

Lakhimpur Kheri nung aluyimertem longkak aitba mapang nung aluyimertem pezü densema nisung ti asüba ken o dak sendakba nung tai tonglokja alirtem rongnung tongtiji Ashish Mishra lir.

Iba tatalokba sülen October 9 nü Mishra apu aser taküm February nung bail nung chioka liasü.

Anogo ishika tejaklen

Yaküm October 3 nü



April 24, 2022 nü New Delhi nung AAP lenir, Atishi Marlina aser Delhi Deputy Chief Minister Manish Sisodia (ajichi) nati Mathura Raod nung Ashram semzüksüba noksa nung angur.

# Amit Shah-i Delhi nung lokti tsüingda rara menokdangtet: Sharad Pawar

**New Delhi, April 24 (Agencies):** NCP Tir, Sharad Pawar-i, Union Home Minister, Amit Shah-i linük yimtiba, Delhi nung tamangba lokti tsüingda raraba menokdangtet, ta aitsü.

Maharashtra kübok Kolhapur nung Nationalist Congress Party (NCP) lokti senden nung jembidang Pawar-i tan ita tetenzüklen Hanuman Jayanti benjung mapang Delhi kübok Jahangirpuri area nung Hindu aser Muslim nung tsüingda raraba metetdaksü.

"Anogo ishika tejaklen Delhi nung lokti tsüingda raratep. Delhi ya (chief minister) Arvind Kejriwal kübok lir saka Delhi police bo Amit Shah leniba nung Union Home Ministry kübok lir. Yimti nung lokti tsüingda raraba Shah-i menokdangtet," ta Pawar-i ashi.

"Delhi nung atalokbatemji alimai meteter. Anungji alimai Delhi nung mepetmesü lir ta meteter," ta paisa ashi.

Karnataka nunga BJP sorkar kübok tamangba lokti tsüingda raraba dak sendakba nung pai, "Board nung minority purtem (Muslim) dokan tenüing aser kiburtem tenüing zülua ayu. Item dokan nungjagi kecha malitsüla ta zülua lir. BJP sorkar aliba state tem nung item ama ya ataloker," ta taoba mapang Union minister-isa metetdaksü.

Amit Shah aija Pawar-i, "Delhi ya asen linük yimtiba lir, aser yimti tesem kar nung lokti tsüingda rara aser kiojen rongdoktsü. Delhi nung nüburtem longjema alitsü atema Amit Shah-i inyaksüla. Nü dak tashi lir saka nai Delhi ama yimti-a maziükteter," ta ashi.

NCP nung inyakerem dang pai, "Asenoki linük nung telemsa adokdaksüba sorkar ya atsüngdoktsüla. Sensak tia nung aliba lanurtem tebilemtsü bentettsü aser osettsüset

jenjang atuba ajanga sensakerem timtemba bentettsü atema asenoki inyaksüla," ta ashi.

Tawa Kolhapur North assembly constituency by election nung BJP-i Kashmir Files film sayua liasü saka Kolhapur nung aliba nüburtemi BJP sendok (Congress candidate-i takok angu), ta paisa metetdaksü.

Linük balala nungi lenirtemi Gujarat dang semdangba dak sendakba nung pai, "International lenir kati Gujarat semdangba atema ni pelar. Ajisüaka taoba mapang US Tir, Donald Trump, China Tir, Xi Jinping aser tang tesüsa UK Ato kilonser (Boris Johnson) nung ajak tanga state-i masü saka Gujarat-i dang anir aoba agi ni süngmanger. Ibaji ajanga Delhi nung yimsüsürtemi tanga state atema mebilemtsüba kuli sayur," ta metetdaksü.

"Iba linük nung telongjem alitsü atema asenoki timtem tulu ajurur. 2014 küm general election nungi tenzüka tamangba lokti tsüingda nüburtem tetsüingda kanga itta kümogo," ta pai ashi.

Tim masüba nung central investigation agencies amshir, ta shia Pawar-i, mezüingbo nisung kari dang Enforcement Directorate meteta liasü saka tangbo ED ya tesem ajaklen lir, ta ashi.

"Tamasa parnoki taoba mapang (Maharashtra) home minister Anil Deshmukh-i sen crore 100 sübokrem agi ta tai tongloktsü, saka tesülenbo crore 4 dang ta ashi. Yamaji (state minister) Nawab Malik anema sorkari küm 20 tashi jembia aruba ken o kakteter aser pa nem tai tongloktsür," ta paisa metetdaksü.

"Union sorkari ED mesüda CBI teyari agia NCP aser tanga opposition party tem ola madokdaksütettsü ta bilemra parnok sowar ama alir," ta paisa shisem.

# India nung ano nisung 2,593 dak Covid putet aser 44 asü

**New Delhi, Rongchii/April 24 (Agencies):** Tesüiba

ghonda 24 tsüingda India nung ano nisung 2,593 dak coronavirus putet aser iba tashidak agi shiranger 44 süogo, ta Amongnü Centre sorkar osang ka ajanga metetdaksü.

Ibaji densemabo tang tashi nung linük nung nisung ajak senteper 4,30,57,545 dak coronavirus puteter aser ajak senteper nisung 5,22,193 süogo.

Tang India nung coronavirus agi teshirangdakpur ano timba küma 15,873 jungogo aser iba tashidak agi shiranger shilem

98.75 (nisung 4,25,19,479) anepogo.

Tang India nung anogo shia coronavirus positive putetba shilem 0.59 jungogo aser hopta shia positive putetba shilem 0.54 jungogo.

Tang tashi nung linük nung samples crore 83.47 tendangogo aser iba nungji tesüiba ghonda 24 tsüingda samples 4,36,532 tendangba densema lir.

Tang tashi nung linük nung Covid vaccine dose crore 187.67 agütsüogo, ta Union Health Ministry-i metetdaksü.



## Nigeria totzū atsüdak apok, nisung 100 dak tema asü Tunisia tzüküm nung rong pezü meküpok



**Abuja, Rongchii/April 23**

**(Agencies):** Nigeria kübok Rivers state nung ozüing alema amenokba totzū atsüdak tesem ka nung Hokulbar aonung apokba lendong nung nisung 100 dak tema asü, ta yangji aliba sorkar ketdangsür aser environmental group ajanga ashi.

"Ozüing alema amenokba rong totzū agütsüba tesem ka nung mi adoka nisung 100 dak tema majiteti arong," ta state commissioner for petroleum resources, Goodluck Opiah-i ashi.

Totzū atsüba Niger Delta nung mapa maliba aser makamaitba ajanga ozüing alema totzū atsüba maparen kanga bulua lir, saka aiben lendong tulu ajurur. Totzū company tulu meyong pipeline tem nungi totzū tazü (crude oil) miima agizüker aser khen asoshi yanglua aliba tank tem nung yanglur.

Iba ama lendong aketba maparen yagi aiben lendong tulu ajurur aser moabu, tzüpokdak aser tzüküm nung totzū yimshiba agi menena aliba tesemtem tali menentsür.

Ozüing alema yangluba totzū alitsü atatepa aliba gari aika iba lendong nung rongdok, ta Youths and Environmental Advocacy Centre ajanga ashi.

Nigeria south tsütsü ozüing alema totzū shishilempaba mapa tesem ter dak tema nung inyaker, ta osangbener kati ashi.

"Mapa manguba lanurtemi parnok takum alitsü mechi pei sasa totzū yanglutsü meranger. Lanurtemi iba mapa nungya lendong lir ta metetaka makamaitba ajanga ozüing agi memelaba refineries nung inyaker," ta ashi.

"Ozüing alema lapokba refinery indang kibur ya atsükshia senzür aser pa ya 'wanted' ta sangdonga lir ta

sorkari ashir. Pa ya apu nungbo lendong atalokba tejangja metettsü imlar," ta osangbeneri ashi.

October ita Rivers state nung ozüing alema lapokba refinery ka nung mi adoka apokba lendong nung tanur kar densema nisung 25 asü.

Totzū tazü auyaba maparen anendaktsütsü meranga maparen tenzükogo ta yangji aliba ketdangsür temi February ita shia liasü, saka takok anguba majiteter.

Africa nung totzū timtiba yanglua aser bendang lima nung ayokba linük, Nigeria nung totzü auyaba aser pipeline raksatsüba nung anogoshi totzü barrel 200,000 shi akoksar, ta sorkari asadanteta lir.

Anungji totzü yangluba company temi teti totzü aser gas bendang lima nun goa ayokba maparen nung nukjidong metongteter, ta sangdonger.

## Sri Lanka den tajangzük kaa sensaksemogo: IMF

**Colombo, Rongchii/April 24**

**(Agencies):** International Monetary Fund-i Honibarnü ashiba agi, Sri Lanka-i loan atema mepeshiba dak sendakba nung tajangzük ka-a sensaksemogo.

Sri lanka tang bendanglen nungi osettem belener arutsü atema timtem aliba mapang World Bank-i ashiba agi, iba timtem mapang teyari agütsütsü atema emergency aid package ka renemdar.

Sri Lanka dang sentsüh agi tsübanger lir aser iba ajanga chiyongtsü aser totzü agi anünger aser iba den ano electricity agi kanga anünger.

Rongsenketzüing nung mepetmesü adoker aliba dang masü saka Sri Lanka nung yimden yimsüsüba nunga timtem adoker lir aser linük rongsenketzüing mashiyimi amshiba atema aija tir Gotabaya Rajapaksa mapa nungi anentsü atema nübürtemi khanga arudar.

SL finance minister Ali Sabry-i senotsü teyari meshia Washington nung IMF, World

Bank, India aser tanga loktitentetem nungi ketdangsürtem den sensaksem aika kaogo.

Reuters sangdong ka ajanga ashiba agi, World Bank indang emergency response package nung USD million 10 densema lir, koba tenüngdakba mozü alitsü atema lir. Iba package nung senotsü kwi agütsütsü iba indang tejangja shia mali saka Sabry-i ashiba agi, teyari USD million 500 shi agütsütsü asadangdar.

Iba teyari agütsüba ajanga tang benoka inyaka aliba bank-financed project tem aser school tanurtem nem mozü aser chiyongtsü agütsütsü aser sensakertem nem senotsü teyari agütsütsü atema mesemtsü, ta World Bank-i taoba mapang ashi.

World Bank-isa iba timtem kanga süoki ia agia, sorchiok dang amshiba gas, chiyongtsü, metsüjangnatsü aser fertilizer aser tanga tenüngdakba osettem agütsütsü atema sensaksemdar, ta official otongdari ashiba Reuters-i

sangdonga liasü.

Honibarnü Sri Lanka nung lenirtem den sensak asema sülen IMF-i ashiba agi, sensaksem ya macroeconomic asüingsashitsü atema rangloker sensaksemogo. Parnokisa social safety net akangshitsü nungdakba aser timtem nung aliba mapang jenjang tamajung alirtem kumzükka ayutsü atema sensaksemogo.

IMF loan aser World Bank teyari den bendenloksema Sri Lanka-i tenüngdakba osettem maneni bener arutettsü atema India dang USD 1.5 billion teyari meshiogo.

Asian Clearing Union nem Sri Lanka-i import payments nung USD 1.5 billion agütsütsü aliba dak sendakba nung India-i teyari agütsütsü molungogo.

Sri Lanka nung tang rongsenketzüing nung mepetmesü adoker aliba nungi anitettsü atema USD billion 4 nungdaker, ta Sabry-i ashi. Parnoki China, Japan aser Asian Development Bank danga teyari meshiogo, ta Reuters ajanga ashi.

**Tunis, Rongchii/April 24**

**(Agencies):** Tunisia tzüküm nung Africa nung migrant aser refugee 120 mena aliba rong pezü meküpokba sülen nisung 12 süogo, ta security ketdangsür kati Retures dang ashi. Item nisungtem ya Mediterranean ajanga Italy-i aotsü merangba mapang iba lendong ajurua liasü.

Tunisian Coast Guard lieutenant colonel, Ali Aayari-i, Sfax tzüküm nung nisung 98 kumzükogo, ta metetdaksü.

Africa aser Middle East nungi taküm libaliro jenjang tajungba ka bushia Europe-i aoertem atema Sfax tzüküm ya parnok apusoba tongtibang tesem ka kumogo.

Interior ministry-i iba hopta

ashiba agi, parnoki taoba kum iba tzüküm nung migrant aser refugee 20,000 dak tema puogo. 2021 kum migrant aser refugee 15,000 shi Italy tongaogo.

Ita ishika tsüingda Tunisia tzüküm nung nisung aika tzüying nung arakseta süogo. Tunisia aser Libya nungi nisung aika Italy-i aotsü merangba mapang lendong timba atalokdar.

Kumtem tsüingda nisung meyirejang aika Mediterranean tzüymküm nung iba tesem tonga aruogo.

UN High Commissioner for Refugees (UNHCR)-i ashiba agi, 2021 kum migrants 123,000 dak tema Italy tonga ogo koba 2020 kumbo 95,000 dak tema dang liasü.

## Tammang madak tesangwa agi takok angutsü: Zelenskyy



**Kyiv, Rongchii/April 24**

**(Agencies):** Ukraine Tir Volodymyr Zelenskyy-i Easter Sunday mapang par linük atema teimla aser takokba indang jembia liasü.

Akhi indang St. Sophia Cathedral nungi jembiba mapang, "Tanü anogo tulu ya ajanga tammang madak tesangwa agi takok angutsü, tamajung madak tajung agi takok angutsü, takum agi tasüba mapadak takok angutsü ta teimla tulu agütsür, anungji Ukraine-i akoktsüsa!" ta Zelenskyy-i ashi.

"Kibuba aser temeshi kotaker tesangwa asen tsütsü lir. Tang asenok tensa kangasa majung ka nung lir. Asenoki iba lenmang nung tatem tongtetti - Ukraine nung tepela aser yimchiyimjung tenzükdak," ta pai ashi.

Easter nung asenoki Tsüingrem dang asen mangdang asangsang akumtsü asoshi taochi asüngdangti - tanü anogo ya tajung lir - iba anogo Ukraine dangi yimjung tesunep arutsü," ta ashi.

Kasa mapang United Nations Ukraine crisis coordinator, Amin Awad-i Mariupol yimti nungi rara mechi mainshiteti aliba civilian tem anizüker aotsü atema tangsa rara anentsüla, ta ashi.

"Mariupol nung tetsür, tanur aser teintet rogotem densema nisung meyirijang aika takum lendongbang nung lir," ta Awad-i sangdong ka nung ashi.

"Takum kumzüktsü atema asenoki rara anena atatsü nungdaker. Mapang talangba ataba ama takum timba lendongi yoktsü. Tang, tanü parnok

kumzükka anizüker aotsü melatsüla. Asüingbo kanga menur asütsü," ta ashi.

Civilian tem timi anizüker aotsü asoshi iba ama yimyim ya International Committee of the Red Cross densema meimchir asoshi inyakba lokti tentet balalai ayima liasü.

Zelenskyy-i Kyiv nung aliba St Sophia Cathedral nungi jembiba mapang COVID aser rara ajanga timtem agütsüba medemdanga liasü.

"Taoba kum tashidak wara mechi Easter kidang among. Taküma Yisu tasü madak takok ngur shia aruba benjong akhi ama memongtet. Ibai ano virus danga ka ajanga lir. Rara ta ajaba wara ajanga lir," ta pai ashi.

"Taoba kum aser taküm lendong ya kasa agi lungjemdaksür: kecha agia Ukraine makoktsü."

Rara tenzükba sülen nisung million 2.9 dak tema Ukraine yutsür Poland nung jenoka lir, ta Polish Border Guard ajanga Deobarnü ashi.

Poland arütsü alema aitiba tang tajemba aser Ukraine-i aor timba lir.

Honibarnü Poland nungi nisung 21,100 Ukraine-i ao aser nisung 15,100 Ukraine nungi Poland-i aitogo, ta parnoki Twitter nung ashi.

Rara tenzükba sülen Poland nungi nisung 847,000 Ukraine-i aitogo.

Rara metenzükdang Ukraine nungi arütsü alema Poland-i aiter ya anogoshi nisung 16,800 shi liasü. Ukraine nung 900,000 dak tema Ukraine nungeri Polish national identity number meshia lir.





April 23 nü Ao Senso Telongjem, Dimapur Tir Meren Longchar den sanen luden züngsemtemi Aoyimkum Village Council, Dimapur den Aoyimkum nung kimen kidang senden agiba mapang agiba noksa ka yangi angur.

## 'CBI 5 The Brain' May 1 nung sayatsü

**New Delhi, Rongchii/April 24, 2022 (Agencies):** CBI franchise nung film pungobuba - 'CBI 5 The Brain' sayatsü asoshi film yanglurtemi anogo sangdongogo. Mammooty-i tongti shilem agiba 'CBI 5 The Brain' film ya May 01, 2022 nü alima tesem ajunga nung sayatsü. K Madhu-i direct asüba investigation thriller film nung megastar, Mammooty-i CBI officer Sethurama Iyer ama shilem agiba angutsü. Mammooty-i social media nung iba film sayatsü osang den külemi film indang poster tasen ka lemsatepa liasü. CBI franchise nung

installment pezü tashi atonga takok anguba sülen, iba franchise nung film pungobuba reprangtsü asoshi film sapurtem kanga yongya atadar. 1988 küm CBI franchise tenzuka liasü 'CBI 5 The Brain' film ya installment pungobuba asütsü. Iba franchise nung mezüing film tenüing - Oru CBI Diary Kurippu liasü. Iba sülen, Jagratha aser Sethurama Iyer CBI saya. Installment tasembuba ya 2004 aser pezübuba Nerariyan CBI ya 2005 küm sayaogo. Küm 17 sülen, CBI franchise nung Mammooty-i detective ama tanaben shilem agiba

angutsü. Saikumar, Mukesh, Dileesh Pothan, Renji Panicker, Asha Sarath, Anoop Menon, and Ramesh Pisharody aser tangartemi iba film yangluogo. Jakes Bejoy-i CBI theme music yanglushia liasü. Swargachitra ajanga CBI - The Brain produce süogo. Tawa sayaba Bheeshma Parvam nung Mammooty-i tesüsa shilem agiba nguogo. OTT sabang nung ajemoka Mammooty-isa Puzhu nung shilem agiba angutsü. Mammooty-i Indian film industry nung ajemoker külen nungi tawa küm 50 abensaogo.

## 'Te Felicito' ken atema rapper Alejandro den longjemmer : Shakira



**Rongchii/April 24, 2022 (Agencies):** Kentener Shakira-i 'Te Felicito' ken atema Puerto Rica nunger rapper Rauw Alejandro den longjemogo.

'Hips Don't Lie' kentener Shakira-i 2022 küm 'I congratulate you' ta nungja agütsüba English ken tasen yanglur asütsü.

'Te Felicito' ya 2021 küm sayaba English single 'Don't Wait Up' den tatongtep asütsü. 2017 küm Shakira-i 'El Dorado' ta nungja agütsüba kensep tesüsa saya liasü.

Taoba küm November ita, Latin pop megastar Shakira-i la meyong LP 'Laundry Service (Washed and Dried)' - 20th-anniversary edition ka sayaba ajaki jangjaa lir.

Arishi küm 45 tain Shakira-i mezüing English kensep sayar külen nungi küm 20 abensaogo.

Iba version tasen nung 'Whenever, Wherever' remix densema track talila pezü lir. 2020 küm February ita Super Bowl LIV halftime nung lai 'Whenever, Wherever' remix ken aten.

Iba ken den bendenloksema, kensep tasen nung Sahara remix, 'Underneath Your Clothes' (acoustic version) aser Afro-punk 'Objection (Tango)' dena lir.

## Küm 5buba nung Calvin Harris-i kensep ka saya

**Rongchii/April 24, 2022 (Agencies):** Taküm tsüklawa mapang Calvin Harris-i kensep tasen ka sayatsü. Küm pungo nung Calvin-i iba kensep mezüing sayar asütsü.


Arishi küm 38 tain DJ Calvin-i Twitter nung, taruba record 'Funk Wav Bounces Vol. 2' lemsatepa liasü.

"Fans temi kensep trokbuba ya taküm tsüklawa mapang angutsü," ta pai ashi.

2017 küm June ita Calvin-i 'Funk Wav Bounces Vol. 1' kensep tesüsa saya liasü.

'I Need Your Love' kentener Calvin-i 2014 küm 'Motion', 2012 nung '18 Months', 'Ready for the Weekend' (2009) aser 2007 nung 'Created Disco' sayaogo.

February ita, Calvin-i



Ushuaia Ibiza nung ki ka aliba sangdonga liasü. Taküm June 3 nungi September 2 tashi Hokolbar anogo nungtugu super-club nung pai shilem agitsü.

Calvin, shibai Los Angeles nung ki tulu ana ayokba sülen

Ibiza nung acre 138 farm ka nung lidar, pai ashiba agi, celebrity ka akümba ya jangratemtsüka masü."

"Taktang nung kija kazüandang pela alir. Yamaji, lanuwa mapang nungi kija dang kazüa intet," ta pai ashi.

**Office of the  
MOLUNGKIMONG SENSO MONGDANG**  
P.O. TULI, POLICE STATION TULI-798618  
DIST. MOKOKCHUNG: NAGALAND

**Molungkimong Senso Lenla Mungdang**  
Tesentepdak : Community Hall  
Anogo : 14-04-2022  
Mapang : 9:00 AM

**5. O lemtep mapang :**  
Molungkimong Arogo otsü ken-o mapang teperi agia jembia aser sensosangeri yamai lemtet.

**Resolution**

1. Ao lima nung mezüing Baptist Arogo 22nd Dec. 1872 Molungkimong tenzük, Khristan yimsü aser Arogo sobaliba otsüren dak sendakba 1872-1876, 24 Oct. tsüingda otsüren ajak Molungkimong nunger otsü shingaia rakteptsü makok.
2. Molungkimong nunger Nüngtem aser Maongka (Title & Privileges) agi Molungyimsen nungeri raktepa par arogo 1872 nung tenzük ta zülua shiti aser Tenla Kidang ayubaji Molungkimong sensosangeri khukua aitsür aser tatem tashi bushitsü. (Molungyimsen 24 oct 1876 nung aküm).
3. Molungkimong aser Molungyimsen Arogo Ken o ABAM-i 10 ben tashi angatangogo (1960-2021) aser Molungkimong nunger temeten agüja lir, saka ano tatempang ka mali ABAM-i ken o ji lapokjen lapoka yuja lir, lbai kangasa tim masü aser nüburtem makmakdaksür.
4. ABAM Temzüng (revised) 2016, ABAM Nükla 2020-30 (2016) aser ABAM Sanen Luden lemtet 19 March 2020 nung Molungkimong sensosanger anüing kübok alir ajak akangakanga nokdaka lir, ABAM-i iba telemteba nungi asetshira Molungkimong senso-i pei temeten wazüka ayutsü asoshi tapet court-i keno abentsü.
5. Meeting minutes aser tongtipang lemtet kar Annexure-1 nung angutsü.

Sd/-  
  
(A PANGERTOSHI WALLING)  
(President)  
Molungkimong Senso  
Mongdang

Sd/-  
  
(J. PUR IZUDIR)  
(General Secretary)  
Molungkimong Senso  
Mongdang


**Office of the  
Waromung Laishir Telongjem  
METETDAKTSÜR**

Waromung Laishir Telongjem Senden May 13 - 15, 2022 Waromung yimtak akatsü sentong renema lir. Anungji züngsem ajak medema iba senden nung atentsü osang yoker.

Sd/-  
**Mr. Aochuba**  
President  
Waromung Laishir Telongjem

Sd/-  
**Miss. AkumlaAier**  
General Secretary  
Waromung Laishir Telongjem

## John Paul arishi küm 71 nung süogo



**New Delhi, Rongchii/April 24, 2022 (Agencies):** Honibarnü Kochi kübok nija mozüki ka nung Screenwriter, John Paul asü. John arishi küm 71 liasü. Taoba ita ana nungi John Paul treatment agia aru aser Hokolbar anogo pa temang kanga mejungi aküm.

Paul-i film talisa Chamaram, Yathra aser Vida Parayum Munbe nung inyakba ajaki jangjaa lir.

Industry nung Screenwriter ama inyaka aruba mapang, Paul-i film 100 dak tema script zülutsüogo aser pai nungtugu director talisa Bharathan, Sathyan Anthikkad aser Joshiy nunger den külemi inyak.

Paul-i script züluba nungtugu film rongnung Chamaram, Marmaram, Ormakka, Palangal, Sandhya Mayangum Neram, Oru Minnaminunginte Nurunguvettam, Neela Kurinji Poothapol, Keli, Malooty aser Chamayam dena lir.

Kamal-i direct asüba film - Pranayameekalude Kadal atema

Paul-i tesüsa script züluba liasü. John Paul asüba osang angashia, social media sabang nung fans aikati asükhu lemsatepa den pa nem akhüm agütsü.

"Na tesünep nung anisüngzüksangma. Onoki na teti bilemtettsü," ta fan kati lemsatep.

"Pai asür Bharathan (#Chamaram, #Malooti #KattatheKilikoodu etc) IV Sasi aser #Mohan den longjemmer inyakba ajanga film tajung aika yangluogo," ta Twitter nung film critic Sreedhar Pillai-i lemsatepa liasü.

John Paul-i MACTA (Malayalam Cine Technicians Association) nung general secretary liasü. MACTA ya film technician atema tentet ka lir.

2017 küm Paul-i Manju Warriar den külemi C/O Sairabanu film nung shilem agia liasü. Iba dak alia, nungtugu actor Mammooty den külemi Gangster film nung Paul-i tongti shilem agiba nguogo.



## Nagaland tetsür team Knock-out atema qualify süogo



**Dimapur, Rongchii/April 24 (TYO):** Senior Women's T20 Trophy 2021-22 nung Nagaland team atema tatembangbuba asaya nung tanü parnoki Amingaon Cricket Ground, Guwahati nung Sikkim run 79 agi koka Knock-out atema qualify süogo.

Toss koka mezü batting amenba sülen Nagaland team-i over 20 nung wicket 2 out ser run 181 yanglua liasü.

Nagaland team nungi opener KP Navgire aser Alemienla na senteper ball 72 nung run 86 yanglu, koba Nagaland team atema iba asayamung nung opening partner-i run timtiba yangluba asütsü.

Asayamung tepeyong Navgire-i kanga junga asaya arudar aser lai iba asayamung nung tanü asaya densema half century asem yangluogo, ajisüaka lai run 57 yanglur aliba mapang nung Purni-i la out sütsü. Iba sülen mapang tatsüka dang lir Alemienla-a (31) Pranita-i out sütsü. Maneni Nagaland team nungi Khemnar (43 not out) aser Gautami (35 not out) nati kanga junga asaya Nagaland-i run 181 yanglu.

Run arishiba mapang Sikkim team nungi Opener Manizha mezüngbuba ball nung Navgire-i out sütsü. Parnok rongnungi Rinki Rajak-i (captain) junga asayaa lai run 41 yanglu ajisüaka

la-a Talirenla-i ball aonba mapang Navgire-i catch asü.

Nagaland team-i ball kanga junga aonba ajanga Sikkim team nungi asayartem mapangshia out asü aser over 20 nung parnoki wicket ti out ser run 102 dang yanglua asaya makok. Nagaland team atema Navgire-i wicket 4 aser Talirenla, Elina Muru aser Gautami nungeri wicket kaka agia liasü.

Plate Group nung Nagaland team-i asaya trokprongla akokba sülen parnok par telok nungi temaba jenjang nung Knock-out atema qualify süogo, koba April 28 nü Elite-A Group nung top 2 team den Surat, Gujarat nung asayatsü.

## Anya Shrubsole international cricket nungi anener



**New Delhi, Rongchii/April 24, 2022 (Agencies):** Brehostibarnü, England women's cricket team nungi Anya Shrubsole-i international cricket nungi anenba sangdongogo. England team-i anaben tashi Women's World Cup takok anguba mapang Anya-i team nung asayaogo.

International cricket nung asaya aruba mapang otsüsütsüsa Anya Shrubsole-i shilem tulu agia lir. 2017 küm Women's World Cup final nung England aser India na final asayaba mapang Anya-i wicket trok agia lir. Iba final match nung England-i run 9 agi India tsükdaktsü.

England tetsür team tenü nungi format ajak nung Anya-i match 173 asayaogo. Item match

nungi lai wicket 227 agia lir.

"Tesüiba küm 14 nungi linük tenü nung asayatsü maongka anguba atema pelar aser maongka tulu ama bilemer. Cricket wadang renloka aoba mapang ka nung tetsür cricket (England team) nung densema ya konang ama lir, saka asaya yimya kanga kara tejakleni aoba asadangtetta iba den meneptepa asayatsü tasak akümer asünung, cricket nungi anisüngzüksü mapang tetemjen ama bilemer," ta Anya Shrubsole-i ashi.

"England team tenü nungi tiaka küm paika asayatsü ta kodanga bilema meliasü aser iba saisapong nung pelashishia shilem agia aru. Item küm tsüngda tamakok aser takok jenti ajangshia aruogo, saka 2017 küm Lord's nung ICC Women's

World Cup takok anguba ya ajak dang tajungtiba lir," ta lai ashi.

International cricket nung ajemoker shilem agia aruba mapang, lenmang balala ajanga nungitta yariba atema Anya Shrubsole-isa lar kibong/adianu dang pelaba lemsatep.

"Iba wadang nung ajemoker külen nungi kibong dang alaka nisung aikati nungitta yariogo aser parnok danga pelaba shisemer, saka tongtibangsa kibong nung tsürabur aser adianu temi metetemi nungitba ajanga jenjang tulu ajangzüktet. Kechisarena ajak nung parnoki kü den amalitepa aru aser parnok teyari maden asübo tanü iba jenjang metongtetla," ta Anya-i shisem.

Tanü tashi, Women's ODIs aser T20Is cricket anaprongla nung wicket 100 agir England bowler (tetsür) rongnung Anya asütsü.

Cricket wadang nung ajemoker külen nungi, Anya Shrubsole-i ODIs 86 nung wicket 106; T20Is 79 nung wicket 102 aser 2014 küm Perth nung Ashes Test mapang wicket 7/99 (career best) densema Tests 8 nung wicket 19 agia lir.

## Bayern Munich-i Bundesliga 10benbuba kokogo

**Rongchii/April 24, 2022 (Agencies):** Bayern Munich-i goal 3-1 agi Borussia Dortmund madak takok ngua otsü tasen ka yanglua Bundesliga 10benbuba atonga kokogo.

Serge Gnabry, Robert Lewandowski aser Jamal Musiala nungeri goal kaka idakja asaya akokba sülen season nung asaya asem asayatsü anunga lia Bayern pur tanabuba jenjang nung aliba Dortmund team dang nungi point 12 agi timba kümogo.

Iba asaya akokba ya Bayern-i league asaya tibuba atonga Dortmund madak takok anguba asütsü, shirnoki 2014 küm nungi tang tashi nung Munich nung asaya ka danga koka mali.

Bayern-i German championship 10buba atonga akokba ya Europe nung temaba jenjang nung aliba league pongu rongnung otsü tasen ka asütsü aser parnoki Juventus-i 2012 nungi 2020 tashi nung Serie A titles 9ben bener aliba ajatetogo.

Dortmund asoshi Bayern meneptsü atema timla kangabo maliasü saka Marco Rose-i aniba asayartemi asayamung atsülängdaktsünüa liasü. Ajisüaka parnoki aibelen aika menaba den maongka aika magitetba ajanga tamakok

angu.

Dortmund-i asaya kanga junga tenzüka saka Bayern-i minute 15buba nung mezüngbuba corner metsüba mapang Gnabry ajanga mezüngbuba goal idaktsü.

Iba sülen Dortmund atema-a Erling Haaland-i maongka tajung ka magitet aser minute 30buba nung Gnabry-i tanbuba goal idaktsü saka pa offside asüba VAR ajanga nguteta liasü.

Gnabry-i Dortmund indang defender Dan-Axel Zagadou nongshia asaya aser yamaji pai pass tamajung ka agütsüba sülen Thomas Müller-i Lewandowski nem ball yangluja Bayern puri tanabuba goal idaktsü. Lewandowski atema iba goal ya taküm goal 33buba liasü.

Kasa amapang nung Dortmund atema Can-i penalty ajanga goal ka idaktsü. Ajisüaka Musiala-i minute 83buba nung Bayern atema goal tasembuba idakja parnoki asaya ayong ayonga akokba den asayamung dena koka liasü.

Kasa mapang nung Bayer Leverkusen goal 4-1 agi makokba sülen Greuther Fürth relegat süogo. Fürth-i asaya 31 nungi point 12 dang nguteta parnok league table pongla nung lir.

## World Cup Stage 1: Rai & Phor nati tarep temeyoktep asaya akok

**Rongchii/April 24, 2022 (Agencies):** Deobarnü Archery World Cup Stage 1 nung India nunger tarep temeyoktep asayar Tarundeep Rai aser Ridhi Phor nati recurve asaya nung Great Britain team koka India team-i gold medal tanabuba koktetogo.

Tena tang mezüngbuba külemi asayar aser final asaya tenzüka mapang tena 0-2 agi tesülen liasü saka tanungba asayatem nung kanga junga asayaa tenati 5-4 (35-37, 36-33, 39-40, 38-37) (18-17) agi koka gold medal angu.

Iba asayamung nung India team nungi tebur compound team asayar Abhishek Verma, Rajat Chauhan aser Aman Saini nungeri Honibarnü mezüngbuba gold medal ngua liasü.

Arishi küm 38 tain Rai, shibai 2010 küm Guangzhou nung Asian Games asayaba mapang silver medal angu, pai tang mezüngbuba World Cup nung tarep temeyoktep asaya

nung gold medal nguogo.

Kasa mapang nung arishi küm 17 tain Ridhi atema iba ya mezüngbuba World Cup liasü. Final asaya nung tatembangbuba set nung tenaprongla point 9 angu aser British nunger asayar Bryony Pitman aser Alex Wise nati 9 aser 8 ngua liasü.

Mezüngbuba set nung Rai aser Ridhi nati red-ring nung anaben (8-8) akha aser point ana agi tamakok angu.

Ajisüaka tanabuba set nung British nunger asayartemi junga masayaba sülen tenati tanabuba set akok.

Set tasembuba nungbo Rai aser Ridhi nati kanga junga asaya 39/40 angu saka British nunger asayar ana yagi 40/40 ngua asaya akok.

Rai aser Ridhi nati takok asoshi meranga asaya aser 10 nung anaben tashi kashia British team nem pressure agütsü, shirnoki red ring nung khen kha liasü aser iba ajanga India team nem takok agütsü.

### **BILEMDANGANG**

**"Tenükmerem ajanga temulung masü tenzükdaktsür."**